



Siverth K. Heilmann

02. 10. 2019

Atassut

UKA 2019/146-1

Utoqqaat illersuisuat pillugu Inatsisartut inatsisaat nr. xx, xx. xxx 2019-imeersoq.

(Peqqissutsimut, Isumaginninnermut Inatsisinillu Atuutsitsinnermut Naalackersuisoq)

Naalackersuisut utoqqaat illersuisoqalernissaa siunertaralugu Inatsisartut inatsisissaattut saqqummiunneqartumut qujanarujussuaq, imatullu Atassut-miit oqaaseqarfigissavarput.

Utoqqaat illersuisoqalertariaqartut, Naalackersuisooqatigiinnissami isumaqatigiinniarnermi ilanngunneqassasoq Atassut-miit kissaatigisimavarput. Naalackersuisooqataanermiit Atassut peqataajunnaaraluartugut, taamaattoq Naalackersuisut pimoorussillusi manna saqqummiupparsi soorunami Atassut-miit tamakkiisumik tapersiissaagut.

Ukiorpassuarni utoqqaat peqatigiiffiini siunnersorteqartarnej ingerlanneqartareernikuuvoq, taamaattorli suliat akisussaaffiillu ikiliartunngitsunut pisariaqartitsineq utoqqaat namminneq qineqqusaarutaaginnannginnissaminnik suaaruteqartuernerat Atassut-miit paasilluarparput.

Naak utoqqaat illersuisuannik pilersitsinissamut siunnersuut Naalagaaffiit Peqatigiit isumaqatigiissumut aallaaveqanngitsoq ilisimagaluarlutigu, Atassut-miit isumaqarluinnarpugut, Inatsisartuni partiit tamatta, una siunnersuut taperserlugu ataatsimooruttariaqaripput.

Meeqqat Illersuisuat, Innarluutillillu Illersuisoqalernerat Atassut-miit peqataalluarsimavugut. Sulisoqarnissaq allaffeqartariaqarnerlu avaqqunneqarsinnaanngimmat, taamaattoq kommuune pilersitsiviusinnaasoq neqerooruteqarnissaa pingaaruteqarpoq. Innarluutillit Illersuisuata allaffianniissinnaanersoq allamiluunniit pioreersumi neqeroortoqarsinnaanersoq, matumani Naalackersuisut kommuunellu neqeroorsinnaaneri Atassut-miit ammaffigaarput ikiuukkusullutalu.

Ilisimavarpullu utoqqaat pitsorissut imminnullu ikiorluarsinnaasut amerlagaluartut, utoqqarpassuupput puigortunngornermik, nappaatinik allanik nalaataqartut, utoqqaallu nuna tamakkerlugu ineqarnerannut tunngasut, utoqqalinersianut, allallu utoqqaat atugaannut tunngasunik misissuisartussamik oqariartuuteqartartussamillu pisariaqartitsineq ersarilluinnarpoq.

Kiisalu paasilluulerutsigit suut peqquataasarnersut, utoqqalinersiaqalernerme Danmarkimut nuuttarneq pinngitsoortikkiartuarnissaanut alloriarnerit tulluuttut iliuseqarfigisinnaalissavagut.

Oqaaserpassuit atunngikkaluarlugit taamatut naatsumik siunnersuummut Atassut-miit tapersiivugut, suliallu aappassaaneernejartigani ataatsimiitaliami susassaartumi suliareqqaarneqarnissaa inassutigalutigu.